


津門雜記

413
567
1



113
567
1-3



津門雜記

門 4 13
號 567
卷 34

光緒十年歲次
甲申秋月新刻

弁言

古人之采輯不遺於下里謳吟風俗之轉
移必驗法隨時觀感吾友張君赤山
以居庸誦讀之餘留心津門民物三十
年滄桑之變興替之殊目覩身經不憚
煩瑣旁搜遠紹援古證今雅俗並宜編

大正十五年二月
花房仙次郎氏寄贈

弁言

輯成帙將一方之風俗人情事蹟原委與
列苑中附錄文人詞翰俾閱者醒心豁目
至用之之苦不口功寓勸懲更補前修
邑乘之所不足迨茲以出先挽回地運
人心况津門密邇 京師久沐 熙
朝雅化休養生息之日餘年人雜五方

素稱繁侈倍易流瀆而災患叠經雖不
乏好義急公之舉自中外交涉後聖屯
墨取踵事增華核尚又一大變藐示
蕞爾盛極堪虞科第連綿培成匪易
幸生斯土者士固窮知自愛婦少中
為節烈者為最多故兵燹頻仍為未

通遭蹂躪蒼之者不在區別於其間苟
道去起而振之或因或創範俗以性
情之正教養厚則風氣清庶幾家裕
戶饒同示太平景象苟以此卷開其
端也豈不巍歎

津門羅浮夢隱



叙

自昔志與史合陳壽志三國志即史也後世州
有志縣有志而府又合州縣以爲志誠以志也
者記事載言凡以備故實資考鏡也顧志或百
餘年一修或數十年一修歲殊世易文獻無徵
往往傳播異詞真僞淆混讀書論世之君子常
惜之於是志之外世又有記畧雜記之作以近
今論之津門雜記亦其一也張子赤山世隸武

又

林幼寓津郡博學多才工書善繪知岐黃識洋
字誦讀之餘每每留心時事凡耳目見聞身所
經歷事有可記悉登諸簡積久成帙名之曰津
門雜記舉以示予兼索序言展而讀之見其所
記踵故增新闕疑徵信凡城邑河渠衙署祠廟
以及海防軍政國俗民風數十年之興廢因革
自鉅及纖燦然明備雖據事直書不加軒輊而
因文見義善者自憬然以思頑者自悚然以懼

所謂論世即寓拯世之意者也吾津素稱畿輔
要地領帶六城中外萃聚花樣日新嘗欲筆記
竊恐聞見未周貽譏大雅因而中止今讀此編
博考典籍參以見聞彰遠昭來有徵而信使讀
之者不下堂而周知四境吾知斯編一出自必
不脛而走不翼而飛將必有爭先睹爲快者爰
濡毫而爲之序

光緒甲申秋杪津門如孩老人書於虛白草堂



自序

僕籍隸虎林生居燕市幼年隨侍僑寓津沽迄
 今將卅載矣嘗考津門爲 畿輔喉襟之地人
 雜五方繁華奢侈習俗使然昔年漕運鹽務盛
 時生意勃勃異常熱鬧迨後屢經災歉市面蕭
 條不無減色惟逢歲時令節尙不致十分冷落
 然較之於昔亦大有懸殊也乃自西洋通款各
 國來津貿易者既夥議准於距城五里之紫竹



津門雜記 自序
林地方設立關權建造房屋中外互市華洋錯處輪艘懋遷別開生面爲北洋通商要地由是益臻繁盛煥然改觀各省宦商晉京者四方人士來遊者接踵而至咸喜留連以瞻風景余以課餘之暇仿都門紀畧滬游雜記留心採訪輯成一書聊備考證其風俗人物有抄於志書者有採諸新報者僅就現在見聞所及隨筆錄之事維紀實語不求工並附錄今昔題咏篇章藉


資潤色爰名曰津門雜記不過拾人牙慧以供談柄耳至於世風人事瞬息滄桑知難詳盡尙待大雅增修以匡不逮則幸甚矣謹序


光緒十年歲次甲申重陽節燕市閒人張燾書於紫竹林寓齋





北三十五里至武清縣界








天津城廂圖



南



天津雜記圖

津門雜記卷上目錄

考畧	形勝
交界	城池
河渠	海口
七十二沽說	濠牆
各衙門行館住址	書院
稅關	新設兵營
會館	浮橋
古樓	倉庫

津門雜記 卷上目錄

鹽坨

古蹟

專祠

龍亭聖廟

各廟宇

清真寺

烈女墓

芥園

豔雪樓

天津剿寇紀畧

附天津縣謝公誄

歲時風俗

婚娶

喪禮

出大殯

鄉甲局

水會

義學

迎春

扶犁

津門雜記卷上

錢塘張 燾赤山氏輯

考畧

天津肇端立衛所，元以前無可考，元時稱直沽，前明始立為衛，按明志天津衛在靜海縣之小直沽。國朝雍正三年由衛升州，九年改州為縣，設府置防，聲名文物之盛，甲於冀北，附郭三百村。

形勝

津地為九河下游，合眾流滙歸三岔河，皆由直沽入。

天津一城，三面臨河，大海在其東南，三角淀繞其西北，為河海之要衝，畿南之屏蔽也。

天津在北京東南二百四十里，地當九河津要，路通各省舟車，南運數百萬之漕，悉道經於此，舟楫之所式臨，商賈之所萃集，五方人民之所雜處，皇華使者之所銜命以出，賢士大夫之所報命而還者，亦必由於是，實水陸之通衢，為畿輔之門戶，冠蓋相望，輪蹄若織，雖大都會，莫能過焉。

附詩

慶雲 崔旭 念堂

畿南巨鎮此稱雄，都會居然大國風。百貨懋遷通薊北，萬家粒食仰關東。市聲若沸魚鰕賤，人影如雲巷陌通。記得銷金鍋子裏，盛衰事勢古今同。

初到津門

武進朱 岷 導江

潞衛交流入海平，丁沽風物久聞名。京南花月無雙地，薊北繁華第一城。柳外樓臺明雨後，水邊魚鱗逐潮輕。分明小幅吳江畫，我欲移家過此生。

交界

天津一縣，東西長九十里，南北寬七十里，東至海一百十里，東南同，西至靜海縣界三十五里，南至靜海界三十五里，西南同，北至順天府武清縣界三十五里，西北至武清界五十里，東北至甯河縣界七十里。

城池

城垣，於前明永樂二年建築，周圍九里二分，共得一千六百二十六丈六尺，計東西長五百零四丈，南北長三百二十四丈，垣高二丈，東至海河二百二十步，北抵衛河三百步，門四，東曰鎮海，南曰歸極，北曰帶。

河，西曰衛安，

河渠

城東北二百步，爲白河衛河之尾閘，交流匯入於海，河名曰三岔河口。

白河，即北運河，其源來自遼外，達入密雲縣石塘嶺關，由牛郎山而來，兩岸皆白沙，不生青草，故名。見通州志又名潞河，由天津舟行北上，曲折至通州，計水程三百五十里，由通州晉京陸程四十里。

衛河，即南運河，人呼御河，古名清河，由天津溯流而

上向南經山東通河南衛輝府再過黃河由江蘇越揚子江至浙江杭州爲止蜿蜒四千餘里

北運河分派有東河即蘆台河由賈家大橋錦衣衛橋陳家溝東去入塌河淀一名大河淀距城四十里北運河藉以蓄洩者也上無來源下通潮汐東南有小河入七里海

白河分派均在城北數里有下西河即子牙河由虹橋通冀州深州廣平府磁州等處又有上西河即大清河由西沽通三角淀達保定府

海口

大沽海口距城百二十里河流入海處也兩岸壁陡一域中橫土人謂之海門又曰攔港按潮汐所至北抵楊村南抵程官屯西北至王慶坨二百餘里皆淡水也蓋鹹潮抵海門而止無岔入者若天設之以限內外斯亦奇矣

七十二沽說

天津有七十二沽之名實只二十一沽曰丁字沽西沽東沽東沽今名窩窪見淨土院磬文三汲沽小直沽大直沽賈家

沽邢家沽、鹹水沽、葛沽、唐沽、草頭沽、桃源沽、盤沽、四里沽、鄧善沽、赦家沽、東泥沽、中泥沽、西泥沽、大沽、此念一沽從西路河名也。餘則在寶坻甯河兩縣境內。

濠牆

咸豐九年統兵大臣親王僧格林沁在津築建濠牆，深溝高壘，距城三里至五六里不等，營門凡十一，圍長共三十六里，人稱牆子。同治七年捻匪北竄，畿南各州縣多遭蹂躪，而津郡賴以安堵。

寇警

前浙江藩司沈兆澐雲巢

曾經風鶴上元辰，入夏匆匆寇至真。馳遠競來千里馬，擣虛誰護四鄉人。貔貅隊整城郭固，郭為備鎗礮機靈火藥新。崇少司馬新練洋鎗隊得力願我登陴嗟耄矣，幸逢頗牧靖煙塵。

寇退 來從雍豫去山東，奔突經時畿輔中。蔓草衰餘除易盡，哀鴻多處繪難工。膏融麥野呼庚息，水挽星河洗甲同。脫劍凱旋農器鑄，鏡清寰海頌綏豐。

各衙門行館住址

提督學院衙門，即貢院，考取七州縣文武生童處，在

東門內迤南

總督行署在河北先為鹽院衙門咸豐十一年裁撤
鹽政歸總督兼管遂改為通商衙門至同治九年裁
撤通商大臣現為直隸總督行轅人稱中堂衙門
直隸總督兼北洋通商大臣每年自仲春節駐津門
至十月冰凍後輪船停行無復往來交涉事件即回
保定節署度歲

津海關道衙門在東門外舊為小直沽鹽分司衙門
於同治九年設立津海道監督新鈔兩關兼海防兵
備道辦理各國通商交涉事件

長蘆運司衙門在鼓樓東大街路南人稱鹽道衙門

天津河間兵備道衙門在東門內大街路北

天津府衙門在北門內儀門西大街

清軍府衙門在鼓樓西大街人稱二府衙門

天津縣衙門在鼓樓東舊倉廩基址

府縣學官在東門內府縣文廟旁人稱文學

總兵衙門在鼓樓西大街人稱鎮台衙門

左營遊擊公署右營守備公署城守營都閫府均在

西門內迤北神機庫汎地

河營守備公署在東門內迤南季家大院

鹽務分司各員均係公館

總理營務處在東門內 軍械所在南門內水月菴

大沽副將公署在城東南百里新城即大沽協台

大沽營遊擊都司海防同知均駐大沽

大沽營中軍守備署在城東南七十里葛沽

鹽關廳在東浮橋迤南爲鹽船過關兌碼之處

督糧廳在河北鈔關東督催南運糧船

浙江糧道行館浙江海運公局在東門外南斜街

江蘇糧道行館江蘇海運總局在城東南開口

書院

間津書院在古樓南大街掌院山長二位分官齋兩課每月考生童二次膏獎需項由運庫支發年終報部乾隆十七年邑紳查爲義捐地基創建有盧公見會碑記可証

三取書院原在三岔河口南岸今移於東浮橋之東乾隆二十年盧州同知王又樸捐修地基建立每歲

束修膏獎，皆由蘆商捐資支給。嘉慶六年重加修葺，今同歸運庫支發。生童課與問津同額數稍次。輔仁書院在城西北文昌宮，每月二次課生童文藝。山長由本籍延請，膏獎需費有捐化生息銀兩。至官課獎銀一項，由道府分府知縣四衙門輪流備發。道光十年邑紳侯肇泰舉人梅成棟創建。

會文書院在城內義倉前，係舉人考課之處。光緒初年立，由署運司祝公塏倡議始，實任運司如公山酌定。由運庫每歲支領京蚨二千吊，以爲經費。歷任津海道並運司天津道捐資，除修造工程外，餘錢六千吊，發典六釐行息，爲士子每月膏火之用。無山長通城現任官輪流月課，皆捐廉備獎。歷任司道施存書卷甚富，經理書院及義塾董事，爲邑紳婁君，每歲立薪水三百六十金，由運庫支發。

稅關

天津鈔關在北門外河北浮橋旁，人稱大關。征收水陸出入貨物稅銀，每年秋令來往商販雲集，出入貨物爲數更多，俗謂之秋頭子。

天津海關在城東南開口河沿征收由海入河貨物稅銀

工部關在三岔河口徵收木料等稅

新海關在城東南紫竹林河岸專司火輪夾板洋船進出貨物稅課各有定章並募西國人為稅務司時給餼廩協同稽查

附詩

津關高設在河干一到河冰收稅難只盼新秋風色好洋船廣到百憂寬

又

咸豐壬子楊光儀香吟舉人津門

鈔關橋上人如鶩商船打鼓馬頭住偷漏不愁長官怒關吏來鈔關開權算弄威福雜坐半輿臺長隄歸去飛塵埃歸去對妻孥妻孥笑相索珊瑚枝大蠟珠白今日放船何所得

新設兵營

大沽海口兩岸舊有礮台峙立威鎮海門鞏固無比真有一夫當關萬人莫能入之勢而又有兵船往來巡哨自制軍駐節天津隨設護衛營及練軍前後左

右中五營，又有親兵水師營，親兵開花營，親兵馬隊，其駐紮處則在三岔河口，河東賈家大橋，河北窩窪，大悲院，大直沽，機器東局左右，西門外教軍廠，及新城，大沽，小站，馬場，軍糧城等處，俱有營盤，屯駐重兵，以資鎮攝，其鎗礮隊間有習德國法英國法者，操演認真，不遺餘力，陣法嚴肅，步伍整齊，真如銅牆鐵壁，不啻如火如荼，軍容之盛，可云備矣。

練軍，即洋鎗隊，每營五百名，人稱一亮子，設總統一員，翼長一員，帶管官一，幫帶官二，正副令官二，帶隊

官十，分帶官二十，薪水以及兵餉，分別行坐支發，所用器械，俱是新式後膛者。

會館

山西會館有二，在河東雜糧店街者，爲西客煙行聚議之所，一在鍋店街，凡山西鹽當雜貨等商，館內各有公所，棟宇巍煥，局面堂皇，內祀關聖帝君，無僧道住持，該館存項甚鉅，皆本省人捐納。

閩粵會館，在北門外針市街，係該省官商捐造，館內專祀天后聖母，無僧道住持，俗呼洋蠻會館。

嶺南棧潮幫公所均在針市街

江西會館在估衣街萬壽宮內

紹興會館在城內鄉祠

山東濟寧會館在北門外西崇福巷

當行公所在北門外迤東

邵武公所在麩店街

懷慶會館在北閣外迤東

吳楚公所在河北大王廟旁

廬陽公所在城內曬米廠丁公祠

浮橋

天津城外浮橋原有四座近年因有營盤又就北河添設一座名曰新浮橋餘則謂東浮橋在東門外北浮橋又名大關浮橋在北門外院浮橋在督院旁西沽浮橋在城北五里

古樓

俗作鼓樓

樓居城中央高三層四面穿心通四大街磚穴最古上懸大鐘晨昏各撞一百八杵城門早晚啟閉以鐘鳴爲準歷有年所聲聞十餘里可預卜晴晦風雨東

面額題聲聞于天，頗雅切。北面有本城名士梅小樹寶璐題聯云：高敞快登臨，看七十二沽往來帆影繁。華誰喚醒，聽一百八杵早晚鐘聲，句甚奇警。樓上供大仙像，居人因保護一城，頗著靈感。朔望香火最盛。

附詩

萊根仙史唐尊恒芝九

古樓高聳在城中，南北東西四路通。一月兩回香火盛，此間供奉是仙翁。

倉庫

倉廩在城北十八里，名曰北倉，計四十八座，每座五

間，共二百四十間，爲屯糧之所。有大史官駐守，又城東南五里梁家園，近年添建倉廩一處，計三座，每座長十二間，寬三間，共一百零八間，以備海運存糧，名爲海運官棧。

運庫在鹽道署內，鹽商納課之銀，歲約四十餘萬，存貯其中，以備解部及支發各種公項。

縣庫是收存徵收地丁銀，按天津實在地畝，共計八千五百餘頃，歲徵銀九千六百餘兩。運解藩庫例應四千三百餘兩，其餘留庫備發本邑祭祀俸金工役

海門雜記卷一
區坊零費之需

鹽坨

天津產鹽甚富，上裕餉需，下應民食，直豫兩省一百八十餘州縣皆賴之。鹽由海灘運津，堆積之地在河東，名曰鹽坨。鹽包纍纍如山，呼曰鹽塢。地佔數里，一望無際。

河東幾甲號鹽坨，堆積官鹽近更多，贏得綱商佳子弟。花天月地會消磨。唐芝九尊恒

堆鹽坨，河流東去無停波，地無青草不種麻，與禾家

家饜梁肉，奴子曳綺羅，笑指玉山高峩峩，道旁一叟

淚盈把，曾是當年鬻鹽者。楊香吟光儀

津門之地本斥鹵，第一生涯惟鹺賈。鹽坨堆積崇如山，遂使後人不知艱。祇道鹽坨終可恃，雙瞳何必識丁字。學人衣食競豪華，精英棄擲等泥沙。一朝化去成烏有，公私交迫真債藪。夙不憂人人孰憂，親朋避之胥吏守。吁嗟乎，自古有餘則爲患，安用坨鹽堆如山。君不見東家散財濟窮貧，至今人稱李善人。又不見西家居奇矜獨智，子孫曾無立錐地。吁嗟乎，堆鹽

坵堆幾多終不可恃奈若何 李采仙雲楣

古蹟

天津衛舊有巡漕御史駐此至今猶有戶部街儀門口倉門口護餉關帝廟等名目尙存

城東南七十里地名軍糧城相傳爲元朝海運屯糧之所

掛甲寺在城東南十二里古名慶國寺相傳唐尉遲公凱兵過此掛甲於寺

鹹水沽在城東南五十里該處左近舊有蚌殼滿地

深濶無涯至今不朽想昔日之海灘即在此無疑也
城內鄉祠相傳有異人僑居一日辭去日後樓墨汚
幸見諒出門不知所往僧旋視之東西粉壁平書進
德修業四大字下遺墨盆又竹竿繫敝帚墨汁淋漓
餘無他物壁高尋丈不知其何以書也筆法秀勁結
構謹嚴如率更體東署乾隆十一年四月五日西署
晉安胡御璣書圓活光潤另具一格至今已歷百餘
年墨色如新聖漫無恙亦一古蹟也

行宮舊跡距城六里在海河東岸 皇船塢舊跡在

紫竹林北海河西岸，今俱廢。

思源莊一畝園，間津園篆水樓，在城東五里錦衣衛橋，爲遂閒堂張氏別墅，款接名流，讌游觴咏之所，今亦廢圯，不及備載。

費宮人故里，在東城內，今名費家衚衕，明季闖逆之弟李虎，曾被宮人刺死，天津名人追弔宮人詩最盛，謹錄其一於左。

明費宮人故里歌

嘉慶庚申梅成棟樹君
舉人津門

析津之水東南流，逆之則剛順之柔，滄滌正氣生女

子，能爲君王執國仇，龍登天，虎犯闕，御溝流水流成血，萬朶宮花葬碧苔，一枝勁草凌紅雪，明家養士三百春，殺賊乃出費宮人，大才小用桑滄變，此恨蛾眉總未伸，蘭缸燄絲陰風慘，刺虎不畏遭虎噉，想見金釵下手時，射虜將軍無此膽，吁嗟乎，青史模糊考未真，人言故里在瀛津，門楣想像今何在，委巷猶標姓氏新，地以人傳名不朽，斷非出自悠悠口，銀瓶雷井將母同，石碣流芳真有偶，吁嗟乎，地不必羣山萬壑，赴荆門，宅不必浣紗溪，近苧蘿村，美人白首終黃土。

宮女丹心有烈魂，廟祀千秋久自彰。詩人載筆著芬芳，至今奇氣鍾難竭。奕世猶傳殷鳳娘。殷氏亦節烈者

專祠

謝公祠，在西門外永豐屯驢市口，咸豐三年與謝公同時赴難之蒙古都統佟公鑑並祀於祠，顏曰雙忠祠。邑紳張公錦文奉旨入祠，亦附於內。又天津縣城隍廟前建謝公祠一處，供木像，香火不絕，乃縣役私奉者。

僧忠親王祠，在西門外大道北。

曾文正公祠，在河北大王廟旁。

丁道祠，在城內曬米廠。

名宦祠、鄉賢祠、忠義祠、節孝祠，俱附祀於文廟旁。由地方官春秋致祭。

怡賢王，昔年興修水利，懋著勲勞，祠在河北金家窰舊址尚在，久未重修。

愍忠祠，在開口下溜米廠大街，為光緒元年漕運委員由海道北上，遭風波，歿於王事，奉旨建祠以慰

幽魂。

龍亭聖廟

萬壽亭在北門內迤東，又名龍亭，內供當今皇帝萬歲牌位，歲時朝賀慶祝，萬壽及宣講，聖諭廣訓，皆在此行禮。

府縣文廟，即聖廟，在東門內大街，又名文學，有牌坊二座，顏曰德配天地，道冠古今，春秋二祭，在二八月上丁日，禮文悉遵古制。

各廟宇

城內東南隅

草廠庵 水月庵 藥王廟 行宮廟 彌勒庵

韋馱廟 關帝廟

城內西北隅

城隍廟 觀音寺 三皇廟 準提庵 三聖庵

白衣庵 武學

城內西南隅

小雙廟 火神廟 達摩庵 湧泉大寺

城內東北隅

三義廟 朝陽觀 護餉關帝廟 甕城關帝廟

財神殿 鄉祠 無量菴 白衣菴 福德祠
奎星閣

東門外

天后宮 玉皇閣 崇仁宮 太虛觀 白衣菴

東嶽天齊廟

西門外

關帝廟 九天廟 慈惠寺 呂祖堂 如意菴

雙忠廟 古皇菴 稽古寺 崇福菴 龍王廟

西大藥王廟 永明寺 黃姑子菴 河神廟

花神廟 育德菴 韋馱廟 玉清觀 板橋寺

火神廟 紅衣寺 白衣寺 海會寺 雲霞觀

大覺菴 福壽宮 維摩菴

南門外

大悲菴 慈航院 念佛菴 恬佑祠 風神廟

弘仁寺 即龍王廟 寶林菴 福德禪林 蘆莊關帝廟

元會菴 開口西關帝廟 三官廟 帝君廟

藥王廟 海光寺 五聖廟 娘娘廟 紫竹林

延壽菴 準提菴 峯山藥王廟 八蜡廟

厲壇寺

北門外

龍王廟

茶棚菴

泰山菴

清淨菴

老君堂

火神廟

天安寺

文昌宮

海潮菴

南閣

北閣

河北

先登寺

獅子林

水月菴

白衣菴

大悲院

望海寺

崇禱觀

香林院

甘露寺

仁天寺

藥王廟

毘盧室

三官廟

大王廟

北極寺

火神廟

祇樹園

玉皇廟

直指菴

龍泉寺

白衣大寺

三太爺廟

河東

三官廟

大佛寺

文殊菴

火神廟

小聖廟

祖師廟

觀音過街閣

塩坨關帝廟

娘娘廟

元帝廟

太山行宮廟

水梯關帝廟

準提菴

西方菴

地藏菴

白衣菴

三元廟

小雙廟

大藥王廟

津城內外真君夥居道士約二百餘衆和尙共三百

津門雜記 卷上
餘衆尼僧共三十餘衆，本邑僧官住持西大藥王廟，道官住持天后宮內管束不法僧道云。

清真寺

回教清真寺，謂之禮拜寺，共四座，一在小夥巷，一在西門外迤北，一在金家窩，一在穆家莊，教中人約有六千餘戶云。

烈女墓

墓在西門外，俗呼烈女墳，原爲陳氏諸氏裘氏丁氏四烈婦之墓，嗣有竒節竒烈者皆葬於其側，樹碑建

祠，曰節烈祠，以垂不朽。

附詩

念堂 崔 旭

墓前石碣一行分，憑弔城西烈女墳，雪虐風饕松柏樹，敢將蔓草比羅裙。

芥園

芥園，又名水西莊，在城西三里，爲康熙解元查蓮坡，黼別墅，其間樓臺之勝，花木竹石之幽，爲津門園亭之冠，昔日如朱竹垞彝尊、朱導江岷之輩，嘗館於此，至吳穀人祭酒、張船山太守諸輩過津時，亦嘗在此。

遊賞今則遺蹟全無，惟見荒煙蔓草，碧水東流，夕陽無語，滿目淒涼矣。

芥園高傍衛河旁，樓閣參差映綠楊。曾是當年詩酒地，行人猶說水西莊。
慶雲崔念堂旭

水西莊上水禽啼，水西莊下水拍隄。詩客酒豪零落盡，渡頭楊柳尚依依。
津門陳亞蘭珍

艷雪樓

艷雪樓在城西御河之北，即水西莊對面。國初詩人佟鏞字蔗村，妾趙氏字艷雪，工詩，樓因以名。刻下

遺蹟蕩然無存，人猶呼為佟家樓云。

附詩

樹君梅成棟

水西莊外綠波生，欲訪佟家買棹行。春草已蕪高士宅，畫樓猶謚美人名。琴奩鏡匣空陳蹟，殘礎荒榛動遠情。一樹海棠花落盡，迴風舞雪撲流鶯。

又

亞蘭陳珍

雪散黃金盡，空傳七字詩。野花如有恨，滿地落愁思。

天津勦寇紀畧

吳惠元

咸豐三年粵逆北犯，運使楊公霈為防禦計，捐廉倡

幸製造抬槍五百桿，招募壯勇，逐日在署教演。名曰蘆團。嗣奉旨前任浙江巡撫梁寶常、前任湖南郴州知州吳士俊、前任良鄉縣教諭汪彭，協同天津地方官辦理團練。寶常等公約廩生王鏞，與闔邑紳民鋪戶立義民局二十八處，每局募勇五六十名，按期訓練。自春徂秋，屢奉 廷寄，僉知寇竄漸近，防守愈嚴。八月朔夜風雨大作，城西北芥園河隄決口。天津道張公起鶴督率官弁堵築，河神恍現，再築再決。芥園隄高與城齊，津邑地勢東凹於西，乃水不東趨，反灌

西南。夜間紅燈隱約，奔流隨之。於是靜海、滄州一帶彌望汪洋，歧途皆爲水沒。僅餘大道，津城西南亦然。衆皆驚異。九月二十六日戌刻，瞥見城東開口迤西之南窪中，隱隱似木筏停泊，諦視若有人潛伏。急報義民局，聞然鳴鑼，立聚千餘人而筏條不見。時探報寇已竄至靜海縣屬之譚官屯。鹽政文公謙傳令二十七日黎明，闔郡文武齊赴教場，屆期官紳兵勇咸集。將出探，衆曰：誰帶隊者？邑侯謝公子澄奮然曰：我何如？衆踴躍曰：聽命。公即去長袍，持槍上馬，民要遮

之曰、公民之父母、不可輕身、我等願爲前趨、行至城西小園、前途無耗、遂暫休息、先是邑人賈慶堂獻策、恐賊於水淺處、鳧渡、城北八里宜興堡、弋鳧之雁戶、善於水中、用佛郎機、技藝精熟、百發百中、宜扼要設伏、以備不虞、梁君寶常等皆以爲然、乃招集之、是日甫募齊、即令慶堂率往、伏於得勝口之東南、而礮臺浮橋濠溝亦均於是日畢工、適邑紳張錦文、前湖北都司倪虎榜、各募勇三千、不期而合、赴小園操演、維時寇已麇聚於距城五十里之良王莊各村、而我衆

不知也、二十八日巳刻、突有老人報信云、寇已在城西黃家墳造飯矣、言訖不知所往、隨登礮臺瞭望、寇果蜂擁而來、邑侯謝公率衆迎勦、運使楊公親率蘆圍堵截、邑人數萬、持械相助、即童稚亦制梃以隨、賊首名小禿子者、矯健絕倫、賊中呼爲開山王、手握黃旗、左右指揮、奮迅剽疾、鋒銳甚、我軍以火鎗擊之、擊上則鼠伏、擊下則翻空、鎗甫住、則隨煙而進、有大沽老卒詫曰、是賊狡滑、非巧取不可、乃以兩鎗上下交擊之、立斃、賊氣奪、猶豕突而前、至伏處呼渡、且誘以

利號鑼一鳴，雁戶鎗排轟發，賊紛紛倒地，驚以爲水雷，遂大潰。是役也，斃賊約五百餘，而我兵勇無一傷者。自逆匪犯順以來，縱橫數省，至此而凶鋒始大挫焉。時援軍未到，賊衆我寡，不敢跟追，賊先遁於楊柳青。旋據靜海之獨流鎮，聞賊敗後，憊甚，沿路枕藉僵臥。識者云：倘有追兵，一鼓而殲矣。惜哉！十月七日，督兵大臣勝保始由深州至津，旋赴獨流，勦賊，邑侯謝公隨之。十一月二十三日，公聞副都統佟公鑑被圍，帶勇馳救，身受重傷，赴水而亡。越日有陣亡役余鵬

龍者，負公尸而出，面如生。次年正月十日，賊乘大雪，回竄山東，往平縣屬之馮官屯。欽差參贊大臣親王僧格林沁築長圍困之，生擒僞丞相林鳳祥等，解京伏誅焉。

附編 咸豐癸丑秋，津邑勦寇獲勝，其間天人感召，良非偶然。是年八月朔夜，風雨大作，城西芥園河隄陡決，天津道張公起鵝，再築再決，夜有紅燈隱隱，引水南趨，居民廬舍無恙，而城南一片汪洋，倏成巨浸。後乃知雖十萬兵力不及此，蓋津邑無險可守，數千

團練何以禦七八萬之強寇九月二十六日戌刻南
窪之木筏二十八日巳刻來營之老人報信莫或使
之若或使之此其中殆有天焉邑自春間奉 旨飭
地方官會同在籍前浙江巡撫梁寶常等舉辦團練
邑紳張錦文捐資助經費並上守禦各策於鹽政文
公謙公善之遂發令箭一枝令錦文照辦錦文悉心
佈置獨力捐練舖勇三千餘名自春徂秋雖寇警漸
逼而迄無確耗錦文於九月十三日募勇士劉姓者
出境偵探二十六日回報始知賊竄入滄境是夜闕

傳逆匪已到人心大震錦文夤夜入縣署謁邑侯謝
公子澄曰寇近矣計將安出公曰妙手空空奈何錦
文曰已備辦矣隨以票錢四千串交公爲募勇費錦
文以賊勢鴟張非有以遏其銳氣不可二十七日黎
明募夫萬餘於小稍直口挑挖長濠復以蘆裹土如
鹽包然堆累成礮臺又將預造礮盤六座設於礮臺
錦文以礮位不能轉移俱即日工藏復入署見謝公
乃創爲之可盤旋施放商議機宜謝公曰昨夜獄犯喧嘩恐生變何以處之
錦文曰莫若擇其罪不至死者出之激令殺賊贖罪

公以爲然，請於各憲，鹽政文公謙曰：誰作保者？錦文挺身任之。內有回民劉繼德者，甫出獄，振臂一呼，回民之奔聚者千餘人，遂飭其率赴教場聽用。適錦文豫引運課銀二萬餘兩至，錦文盡數易錢，分寫四百文一紙帖票，爲發付勇糧等用。二十八日寅刻，同城官齊集教場，正擬差探，突有老人來營曰：賊距十餘里矣。隨登礮臺瞭望，瞥見賊蜂擁而來，奮迅剽疾，至濠而沮。邑侯謝公子澄率勇迎勦，津鎮特公克慎親燃大礮，運使楊公需督率蘆團抬槍，一齊轟擊，我衆

繼之，而邑人之助戰者復數萬人，遂敗賊於稍直口。

因改名先是邑人賈慶堂獻策，以城南如澤國，不能

紮營，宜伏排槍防賊偷渡。排槍者，以佛郎機置小舟上，覆以蓆，推行水中，村民用以弋鳧者也。雁戶各官皆以爲然，倉卒募齊，即合慶堂率往設伏。是日賊果分股東竄，至伏處呼渡，雁戶佯應，推舟而前，距賊數武，號鑼一聲，排槍轟發，賊紛紛倒地，噉然返奔。遂大潰。錦文見我軍大獲全勝，恐兵勇飢疲，火速回城，將預備之饘餅數千觔，輦送大營，城中住戶效之，亦爭

送焉，謂之得勝餅，是役也，冥漠垂佑，衆志成城，官民紳董戮力同仇，錦文捐資數萬，運以智謀，乃克共奏膚功，而事機湊合，不可思議，說者謂倘逆匪先一日竄津，戰守之具未備，有不可問者矣。天耶人耶，迨後戊午庚申海口不靖，錦文於事勢危急之際，權宜維持，力顧大局，幾爲謫言蜚語所中傷，錦文不爲動，而卒無患，戊辰捻匪之擾，復與闔邑官紳力籌防禦，邀天之福，盡其人事，均得化險爲平，里人感錦文保衛功，前後贈匾凡數十方，旋經大吏入告，溫詔褒美。

賞給一品封典，欽頒尙義可風四字匾額，以光其闔子汝霖，因在事出力，由道員賞加二品頂戴，孫鴻壽，恩賜舉人，准其一體會試，人咸以宸眷優隆，艷稱異數，不知錦文禦災捍患，自軍興以來，闔邑倚爲長城，豐功偉烈，雖婦孺亦樂道之，其人傑矣哉。夫天道遠不可知，而當時之人事有不容沒者，附記篇末，以爲好義急公者勸。

城西芥園決口前一日，隄上有二人徘徊往來，一人曰：湏在何處，一人指曰：此處即可，咸以爲異，次夜隄

潰即所指處也。西南有廟曰雲霞觀，正決口之下游。乃水至觀後，忽分東西流，繞至觀前，復合流南趨。以至滄州之捷地，彌望汪洋，惟大道僅存。匪因水阻，東竄迂緩，故稍直口得以預備。

邑生王某者，在城西十三里姜家井訓蒙。九月廿八日巳刻，忽一人闖入塾中，貌皙白而溫雅，曰：汝弗懼，其速具食，詢以此村何名，距城幾里，屯兵若干，城已膽出否。正探問間，突有匪報曰：頭陣敗，繼報曰：二陣敗，俄頃又報曰：開山王陣亡，其人拍案而起，匆遽出。

門西竄，有識者曰：此即逆首李開芳云。

天津鎮協各兵，歷年調外防堵，存城無幾。九月二十八日之捷，僅賴運署抬鎗五百及所練義民舖勇數千人而已。

十一月廿三日，邑侯謝公陣亡時，有縣役余鵬龍，賈平五等四人，甘心親隨，一步不離，同時殉難。及邑侯尸身入城，比戶男婦老幼無不痛哭如喪考妣，路祭接排有三千筵。按癸丑歲，髮逆竄擾津門，勦禦之功，其最著者，官則雲舫謝公子澄，已奉 旨追贈布政

使銜照銜議卹世襲雲騎尉職並於天津及四川原籍建立專祠紳則秀岩張公錦文迄今人艷稱之亦人願聞之二公駿烈已載入府志焉

天津縣謝忠愍公哀祠並序 擘楊慎恭醉六

嗚呼津邑賴公而存而公卒不免死於戰天耶人耶嗚呼哀哉粵寇流毒郡邑被其害者指不勝屈或不戰自潰或戰而不支天討雖嚴賊勢亦熾未易盡殲之也而且嘯聚巧竄軼捷偵伺狡其敢於直趨天津蓋稔知津鎮之現兵無多矣津民固多勇敢而團

練未久招募未齊紀律難施似同烏合期其殺賊如私鬪之健也憂憂其難公文吏也披赤心明大義身先士卒以死自矢津民原皆不頑梗獎勵咸孚莫不以一當百稍直口一戰賊鋒挫賊勢蹙國威壯民心安內外數百萬戶靡不忭舞欣幸慶縣尊之免我於鋒鏑且靡不祝公以遐福也而公今竟罹於鋒鏑之慘嗚呼哀哉天道無乃茫昧乎賊之敗而遁也諸上憲以守城之責止公之追繼而大帥至繼而朝命降公遂義不返顧矣賊據獨流築木柵不易攻

不可誘，公屢衝其壘，皆捷。賊固甚畏公，茲之敗也，非
敗也。人事多參差，嗚呼哀哉！公之禦賊也，在季秋下
旬之八日，公之致命也，在仲冬下旬之三日，兩月之
間，勞悴辛苦，不問可知。况兼赤手措辦，拮据萬難，士
卒尙有時而逸，有時而甘，公則極其勞，極其苦，心血
更不知消耗幾許，即不至戰而死，亦必由勞苦而病，
病且必沉痾，沉痾終亦難醫也。嗚呼哀哉！公本一寒
儒，宦十年，仍然故我，而公毫不介意也。惟知報國，
惟知保民，肩人所難，不欺素志，即使生而獲報，榮陞

之際，亦必扳轅環送，泣數行下。矧今死於行陣耶，嗚
呼哀哉！方今大兵四合，妖氛計日可淨，將見歌凱者，
賀勝者，歛至者，策勲者，解嚴者，安堵者，紛紛焉，皆樂
境也。而公竟何往乎？特恩之錫，公果死而有知乎？
史官能詳以記乎？否乎？然婦孺亦誌而傳之，夫何庸
縷悉以述乎？而利之當興，害之當除，患之當防，又皆
待公經綸於成功之後者也。今復何所望乎？公之莅
任於天津也，凡二年，不侵事，不立威，似因循，似交弱
也。人皆忽之，臨大事，乃見奇節，嗚呼哀哉！節則奇矣。

死何太慘乎爰綴哀詞參諸銘誄

賊飛來公不驚交而武民皆兵賊滔天恣騰凌驟勝
之撼櫓槍功如此公不矜公之志安民生賊不殄心
不平獨一隊壓賊營戰屢捷功將成猝遭變命難評
公保境歡聲騰公捐軀哭聲轟萬萬古鳴英聲

輓聯

天津華長忠 蔡生

化洽津門使斯民有勇知方家學無慚晉太傅
魂歸蜀版似此日鞠躬盡瘁祠堂宜近武鄉侯

又

天津梅寶璐 小樹

赤手挫櫓槍慟閭閻頓失瞻依沾水生寒疑血淚
丹心光俎豆知靈爽不忘捍衛蜀山含憤返忠魂

天津縣謝忠愍公誄

并序 獻縣 牛元愷 廿五階

維咸豐三年冬十一月二十三日晉贈通奉大夫天
津令城都謝公卒於軍嗚呼哀哉初粵西之地奸民
不靖衆雖烏合勢實鴟張天師降討固不難終於殄
滅而蜂薶有毒驟失小利百姓流亡塗炭半天下武
昌之地險不可憑金陵之城堅不可恃若夫裨將偏
師之隕首覆軍者蓋以十數而剖符專城紆青拖紫

清門雜記 卷上 三
之司失其守者相望於境癸丑秋九月下旬匪徒突
至蝟毛而起人馬縱橫絡繹數十里旌旗蔽天日豺
狼蛇豕搶搶擠擠於道路之間沾上之民有死心焉
况彼時營五之中頻年徵調去者十九存者十一重
以蕞爾孤城久即彫敝臨時補葺亦屬徒勞軍弱城
危郡人愈駭公乃召集黎庶三日之內衆志成城裂
裳爲旂脫耒爲兵以不教之民當慣戰之衆率熙穰
之子禦倉猝之兵而賊蜂擁直前奮勇十倍干戈如
林礮石如雨彤珠四射白矢亂飛衆寡不敵步馬相

懸孰勝孰負不待知者而明矣然能斬將擐旗殄其
梟帥致賊紛紛鼠竄望風而奔津郡內外數十百萬
之生靈藉安衽席者實生於我公一人之手也迨其
後醜類受挫退守會川王旅駢闐雲屯叢集大將專
征於閩外小醜遠隔乎境中若公者職非武臣身居
邑宰似可守此一隅無事任干矛冒矢石追逐乎疆
場鋒鏑間矣爾乃矢公忠之念消畛域之心慨然率
所募丁壯自成一隊身經三十餘戰高勳鴻烈炳焉
與日月爭光兩月之間衣不解帶食不兼簋禪蝨盈

搦鞍馬膠身時值嚴冬天氣栗冽積雪沒脛堅冰在
鬚雖健兒勁卒有不勝其墮指裂膚之苦者書生病
骨其何以堪而公殊自若也其肝膽意氣古所稱忠
臣義士不在茲乎而孰意彼蒼夢夢事竟有不可知
者日者賊衆出巢渡河北向經畧大將軍命所部將
官迎擊賊勢大潰便欲引還行抵河干見所造浮梁
已爲官軍焚燬歸路斷絕遂乃沿途東走豕突公營
而公以六百餘人與之擊搏斯時也河流有聲日薄
無色天地爲之震動風雲爲之變遷刀矛之聲錚錚

滿耳自凌晨以至薄暮屍骸枕野互有斬亡竟以援
救無人衆皆枵腹小挫於頃刻之間公猶奮不顧身
有進無退賊人抗拒刺以長戈身無完膚血流至足
而公失馬矣猶且張空拳冒白刃手斃數賊而後已
焉何其忠勇果毅視死如歸竟若是也豈不壯哉豈
不壯哉嗚呼津郡之民死而公生之津郡之民生而
公死之宜其耕夫輟耒桑婦下機致劈面之哀深罷
市之慕城府颯然街號巷哭一時有何怙何恃之思
也悲夫悲夫昔者司馬叔持手劍父讐死而無悔漢

津門雜記 卷上
明帝命班固爲之誄，關中侯馬敦死於汧獄，而潘岳亦誄之焉。若是乎忠孝義烈之流，慷慨立節而死者，綴辭之士，未之或遺也。天子既策而贈之，受公生我之恩者，敢闕其文哉。乃作誄曰：

嗚呼謝公，其德如天生，有自來，死有固然。蠢茲醜虜，西侵我邊，危如累卵，急若倒懸。惟公仗義渠魁，是殲民賴以保，城賴以全。逆氛既挫，亮節愈堅。忠義克奮，英武畢宣。昂然七尺，身爲國捐。騎彼箕尾，歸於星躔。弔者接踵，哀者比肩。婦孺掩泣，矧曰知賢。名榮山岳，

氣塞天淵。雖死之日，猶生之年。明明天子，嘉乃功焉。登之廟堂，祀之豆籩。司勳頒爵，與世相延。忠魂有知，慰於九泉。

謝公祠迎神曲

津門楊光儀香吟

杜鵑啼兮蜀道長，櫂槍照夜兮海天蒼。旌旗黯兮鼓聲死，大星落兮劫灰涼。流水今日兮血碧，風吹古壘兮雲黃。廟貌兮河上，祀事兮孔明。叶撞鐘兮伐鼓，芒登兮升香。我隍我城兮蕩蕩，我稼我穡兮穰穰。神之來兮我言，津之人兮樂康。

東望蓬壺兮海漫漫，南指箕尾兮夜將闌。神歸兮何所，靈旂轉兮連蜷。佩長劍兮御虎符，射天狼兮帶星弧。孤忠毅魄兮雜遝，馭長風兮前驅。蕭光兮若霧，車馬兮有無。念我故侯兮心煩紆，眷茲土兮其少留。叶欲少留兮不得，晴光滿兮雲衢。

右送神曲

祠堂聯

津門梅寶璐 小樹

破敵扶危，肥水舊勲同一轍。鞠躬盡瘁，錦官崇祀並千秋。

歲時風俗

天津無沃壤，腴田民多以賈趨。利人雜五方，俗尚奢華。禮教日興，科第接武。富者多好倡，爲善義行。其貧者就死不悔，勇於赴難而不屈。習使然也。更有歲時俗禮小節多端，畧記於下。

立春日，食紫色蘿蔔，啖餅，謂之咬春。

正月元旦，味爽，長幼皆起，盛衣冠，設香燭，拜天地先祖父母，以次而同食角子。取更新交子之義。親友詣門互拜，數日交相宴會，名曰請春酒。

元日至初五日，不以生米爲炊，謂之忌破五。
上元日日燈節，通衢張燈結綵，燃放花炬，遍地歌舞，
食湯團日元宵，諸寺觀作天官會。

二十五日，羅灰於地，作圀形，名曰打圀，中置米穀少許，曰填倉，預卜豐兆。

二月初二日，以百蟲皆蟄，謂之龍抬頭，以穀糠引錢龍至家，是日食餅煎糕粉，並祀土地神。

三月初三日，文士祀文昌帝君於城西廟中，人以所檢字紙，是日送入廟中，焚化之。又謝公祠賽會。

清明日，男婦各上墳，陳祭品，焚紙錢，增土於塚上，日添墳，哭新鬼尤慟。

二十三日，天后誕辰，預演百會日皇會，備極熱鬧。

四月初六初八兩日，府縣城隍神出巡，賽會赦孤。

初八日爲佛誕辰，以葶豆飼行人，日結緣，是日斷屠。

二十八日藥王誕辰，各廟作會。

五月端午有龍船戲，比戶貼葫蘆門符，插蒲艾，食角黍，飲雄黃酒，繫兒以綵線，曰長命縷，又採百草爲膏。十三日，相傳爲關公磨刀赴會之期，是日必雨，諺云：

大旱不過五月十三

夏至日以東風爲水徵，曰夏至東風搖，麥子水裏撈，榴月俗謂毒五月，凡死傷人命各案，每於此月層見疊出。

六月六日曝曬書帙衣服等件，鈴鐺閣作瞭經會，

初伏日食麩，飲綠豆湯，是日雨爲旱兆，曰初伏澆，末伏燒。

十三日日分龍兵，有勤龍懶龍之分，是日雨爲久雨之兆，不雨爲久晴之兆。

二十日至二十八日爲諸神誕期，連日必雨，居人謂之連陰天。

七月七日女子以花針浮水面，覘其影，曰乞巧。

立秋日以雨爲秋澆之兆，俗呼秋灑，不雨爲秋晴之兆，俗呼秋弔。

立秋之時食瓜，曰咬秋，可免腹瀉。

中元節祀祖先，作盂蘭會，放荷燈，燒法船。

八月朔日雨，爲旱兆，諺云，八月初一下一陣，旱到來年五月盡。初三日祀竈神。

中秋節陳月餅瓜果拜月日圓月

二十七日至聖孔子誕辰學校中人士敬致祭於文廟奠獻如禮

九月九日重陽節食糕登高作北斗會

十七日祀財神最盛

十月初一日祀祖先作五色紙衣焚之曰送寒衣紙名蠟花紙

二十五日日皮襖生日俗云是日晴則一冬凌是日陰則一冬溫

十一月冬至日繪消寒圖食餛飩

十二月初八日作佛會清晨有施豆者先於夜間跪佛前每捻一豆念佛一聲曰結緣豆又以米豆棗栗雜煮之曰臘八粥兼飼行人

是月多嫁娶如古仲春會男女俗云趁亂歲

二十三日祭竈謂竈神昇天

除夕接竈祭神祀祖先拜尊親曰辭歲夜飲不寐曰守歲爆竹聲通宵不絕

婚娶

津俗婚嫁不拘六禮，但以通媒爲定。男家備簪飾數事爲定禮，換帖娶之前一日，女家舁送粧奩，至期娶親儀仗有明角燈、串燈、旗、羅傘、扇、文武執事、銜牌、鼓樂等類，又有公鷄、涼蓆、宮燈、雙明、然燭如臂，名曰子孫燈，彩輿八擡，高如塔，鑲金爲花，作螽斯衍慶，麟趾呈祥諸式，貧富禮同。親迎者少，女則冠髻入門，設弓箭拜天地，飲合巹盞，名曰交盃盞。三日謁家廟，拜舅姑伯叔，以次，謂之分大小。婦家三日內多饋禮。唐芝九尊恒竹枝詞云：婚喪總是大排衙，不論紳民。

士庶家宰相官銜狀元第，教人未看眼先花。

喪禮

民間親將歿，擇吉方停道遙牀，置親於上，歿後請陰陽生擇時成殮。俗傳三日魂靈上陰府望鄉臺，孝眷均痛哭於靈下。是日送路，五日成服，首七誦經，紳士家行家祭禮，開弔殯期發引前一日行祖奠禮，焚燒紙絹紫綵，親友送輓靈綾幛對聯甚夥。

出大殯

津郡每遇喪事，輒高搭捲棚，門豎牌樓，開喪受弔，雖

在平民其氣象居然大家每七延請僧道禮懺誦經尤重出殯之舉窮奢極侈過分越禮且隆而重之曰大殯前用鑿駕牛副黃亭兩座次則官銜執事百餘對開道鑼清道旗開喪鼓依序而行然後爐亭香亭影亭靈亭彩旛傘蓋朝服鮮花僧道行香魂轎魂旛銘旌等事送殯親友相間徐行一路長吹細樂香盤提爐對馬旂槍不下數百人最後引路神童玻璃繡金高槓棺罩以數十人舁之而行其後則送喪車轎多至十數乘其幢旗旗幟之債價執事夫役之工食

一切費用恒有糜千金者殷富之戶尙不足深惜其左支右絀東挪西移者亦難以屈指計謂不如是不足爲宗族交遊光寵惟出殯既如此奢華落葬宜如何鄭重乃誇外觀之有耀昧入土之爲安親朋執紼送喪自郊而返大都則棺柩委之路隅津人名之曰坵遂以爲畢乃公事求其馬鬣早封牛眠預卜者十不一覲往往柩上金字某祖某妣赫然如新而棺木已爲風霜剝蝕狐鑽獾穴觸目悽然是皆當年出大殯者也

附詩

王韞徽 淡古音

不論商賈與平民，每遇昏喪百事陳，
簫鼓喧闐車馬盛，衣冠職事一時新。

觀送葬有感

嘉慶庚申梅成棟樹君
舉人津門

誰家鼓吹出城西，翠幙紅旌上大隄，
柩內形骸千古夢，路旁兒女數行啼，
親朋相送臨歧返，翁仲無言落日低，
華屋山邱彈指事，人生未有不黃泥，
又津俗凡遇幼殤，謂不宜棺殮，
並不得附葬祖塋，祇以蓋墊包縛兒體，
投之中流，或置之曠野，蓋墊者，津

人覆釜之物，以葦篾編成，形式八角，
意謂兒殤得此，即不辨東西，
轉世託生，不復前來，
溷我任飽魚鼈，犬豕之腹，
而不之顧，忍心害理，
此亦習俗之最可怪者。

鄉甲局

天津民風好鬪，趨向不端，
光緒戊寅歲吳中王樸臣明府炳燮宰是邑，
敬刊 聖諭廣訓直解，
聖諭廣訓十六條附律例易解，
又參考成法，修訂鄉甲約一書，
約規二十則，在菴觀祠宇設局宣講，
扶持正教，以期潛移默化，
使人心風俗一歸於正，
法良意美，頗得

津門雜記 卷一
四
爲治之要也。嗣因相沿日久，紳董習爲故事，講生奉若具文，復蒙督憲出示曉諭，飭令認真整頓，照常辦理，務使闔津軍民諸色人等恭聽宣講，身體力行，改過遷善焉。憲示照錄

太子少保署直隸總督兩廣總督部堂張 爲出示曉諭事，照得爲政首重訓民，善俗莫先興教，津郡五方雜處，良莠不齊，民多囂悍，動輒鬪爭，俗尙浮華，鮮知節儉，尤非教化不可。光緒四年原任天津縣王令炳燮議稟舉行鄉甲宣講，聖諭廣訓業經李閣

爵部堂批飭照辦，委員戴令華藻會縣率同紳耆，真經理在案，恭查聖諭廣訓係本世祖章皇帝欽頒六諭，聖祖仁皇帝衍之爲十六條，世宗憲皇帝又尋繹其義，推衍其文，共得萬言，名曰聖諭廣訓，皆孝親敬長，講信修睦，重農務本，惜財節用，戒訟息爭之要道，所以崇正黜邪，化民成俗，不使踰閑蕩檢，作奸犯科，意旨深遠，凡讀書明理之士，固應敬謹熟讀深思，其兵民各項人等，尤當恭聽宣講，俾可改過遷善。昨據委員戴令會同張承恩、霽稟稱近來

講者頗少懇切之心，聽者難動信從之念，殊屬非是。現飭員紳認真整頓，咸願推誠勸誘，仍於寺院寬曠房屋照前設立四十五處，按期宣講，合行出示曉諭。此後務各實力奉行，講者無視爲具文，聽者宜加意體會，庶人心一歸於正，而不陷於邪，囂悍浮薄之風化而爲仁厚敦龐之俗。本署督部堂有厚望焉。特示。
光緒九年六月二十二日示

恭錄邸報

李鴻章片 再據天津府紳士四品銜吏部主事李

世珍聯名呈稱，原任天津河間兵備道劉秉琳，潔己愛民政，平訟理。光緒二年直境亢旱，竭誠祈禱，捐廉助賑，施衣施藥，全活饑民無算。津郡創設備濟社，廣仁堂，勸勉紳董實力奉行，扶正黜邪，不避嫌怨。原任天津縣知縣王炳燮，講求理學，文教聿興，崇儉黜奢，風俗立變。救荒挑河諸政，必躬必親，舉辦鄉甲，禁暴鋤奸，勸善規惡，津邑强悍之風爲之斂戢。採訪節孝，建立善堂，凡有義舉，不辭勞瘁。以上二員，清正廉明，閭閻至今感戴。呈請附祀前督臣曾國藩專祠前來。

臣查劉秉琳、王炳燮，皆由進士出身，品學端詳，饒有風力。在任數年，地方政事，綱舉目張，無時無事，不以休養民生，扶持名教爲己任。茲已先後病歿，臣接見紳耆，道及該員等善政遺愛，莫不同聲感佩。歷久不渝，無愧循良之選。茲據合詞呈請，相應籲懇 天恩，准將前任天津兵備道劉秉琳、前任天津縣知縣王炳燮，附祀前大學士直隸督臣曾國藩天津專祠。由地方官春秋致祭，以順輿情而彰治行。伏乞 聖鑒訓示，謹附片具 奏。 光緒九年九月奉

旨著照所請該部知道欽此

水會

津郡人煙稠密，店舖毗連，有時不戒於火，爲害甚烈。一經燎原，亦有乘機搶奪者。本城各紳商舊有捐立水會四十多局，置造救火各樣器具，詳立章程。遇警鳴鑼傳遞，名曰串鑼。各局頃刻奔集撲救，並不私分畛域，分疆劃界。無論晝夜，弗辭勞苦。救火人名伍善，半屬負戴貿易之人。身穿號衣，捍患禦災，爭先恐後。情願急公，分文不取。災場附近之家，多因未及延燒。

以點心數百筋相助者，火既熄，乃緩其鑼，名曰倒鑼。按道里遠近，分次序而散，一方賴之。常例於每年春秋兩季，捐款呈供演戲，敬祀赤帝真君，設席酬勞。伍善名曰擺會，餘項公存，會首經營，以備救災時。蠟燭茶水零費，支使會中定章，意美法良。然而在會伍善間，有少年喜事之流，常因救災擁擠，不相遜讓，往往與別會角勝，以鬪毆從事，此亦美中不足，可供人指摘者。

會名附 天安 衛安 郡安 衛善 聚勝

普濟 清安 逢源 上善 聚善 靜安 壽安
眾善 天澤 永善 普安 天泉 公善 永安
保安 從善 同安 湧泉 澤濟 同善 天一
勝濟 湧濟 沼濟 庚濟 丙安 助水各局
勝水五局 塩坨六局 每會俱有首局分局

附詩 念堂 崔 旭

結社同防回祿災，登時撲滅贖殘灰。鑼聲幾道如軍令，什伍爭先奮勇來。

又 芝九 唐尊恒

祝融何處忽爲災，百道鑼聲遠遠來。富室最宜多犒賞，點心滿盒酒盈盃。

義學

天津義學向不多見，即有之亦如晨星落落。貧家子弟大率以賣糖豆爲生，日賺數十文，或沿途爬草拾柴，以供炊爨，無以讀書爲當務之急者。近自鄉約盛行，敬謹宣講，聖諭廣訓，津人始以不識字爲愧。當道因勢利導，各捐廉俸，設立義學，城廂內外共有三十餘處。由長蘆運司設者九處，經費由鹽務中籌措。

塾中各事由綱總主持，而聘請塾師，尤其專責也。由津海關道設者十三處，由府設者兩處，由縣設者四處。定例一館教育寒賤子弟十六人，塾中書紙筆墨茶水及塾師脩脯，冬日爐火，夏日涼棚，一切支銷，皆由公項撥給。又津海關道設有正副稽查義學委員，月給薪水，核其功課，法至善也。近由天津道偕海關道兩觀察，又加設義學四所，名之曰正本，務本，敦本，立本。蓋以小子爲成人之本，詩書爲風化之本，其塾中章程，凡富厚及小康之家子弟，概不收教，委係寒

素無論遠近儘可送塾觀察給各童四季衣服俾隨時更換又日給麪十二兩以充口腹月之朔望又躬請各塾面加考試與以獎賞洵可謂恩周童孺者矣此外並有看取文藝之總塾日會文崇文崇正崇敬等名目

河北趙紳士河東李紳士皆就該處立有義學數所又大關總辦設立者五處一切費用由大關自備云清真寺義學二處均在城西爲回教中人捐助設立者訓迪本教寒苦子弟規條亦善

迎春

立春前一日曰迎春是日辰刻地方官自府縣以下皆衣朝服乘煖轎全幅儀仗鼓樂前導恭詣東門外天后宮致祭芒神春牛祭畢將春牛舁至府署俟明日葭琯應律之時照例行打春之禮觀者甚衆

扶犁

春耕盛典每歲清明節後亥日舉行在紫竹林北上園之先農壇一名天壇有司官自道府以次咸集朝服致祭文東武西三跪九叩祭畢即卸冠裳作農裝

從容舉止按例而行扶犁驅犢凡數推數返播種而
回此重農禮也是時黃童白叟環而觀者以千百計
羣希豐年多稼大有頻書閭閻之樂利無窮焉

津門雜記卷上

早稲田大学図書館

011688998311